

今

詞

初

集

題辭

詩三百篇音節參差不名一格至漢魏詩有定則而長短句乃耑歸之樂府此花間草堂諸詞所託始歟詞與樂府有同其名者如長相思烏夜啼是也有同其名亦同其調者如望江南是也遡其權輿實在唐人近體以前而後之人顧目之爲詩餘義何居乎吾友梁汾常云詩之體至唐而始備然不得以五七言律絕爲古詩之餘也樂府之變得宋詞而始盡然不得以長短句之小令中調長調爲古樂府之餘也詞

且不附庸於樂府而謂肯寄閨於詩耶容若曠世逸才與梁汾持論極合採集近時名流篇什爲蘭畹金荃樹幟期與詩家壇坫並峙古今余得受而讀之余惟詩以蘇李爲宗自曹劉迄鮑謝盛極而衰至隋時風格一變此有唐之正始所自開也詞以溫韋爲則自歐秦迄姜史亦盛極而衰至明末才情復暢此昭代之大雅所由振也詞在今日猶詩之在初盛唐唐人之詩不讓于古而謂今日之詞與詩必視體製爲異同較時代爲優劣耶茲集具在卽攀屈宋宜方

駕肯與齊梁作後塵若猥云緣情綺靡豈惟不可與
言詩抑亦未可與言詞也已書以質之兩君子
康熙丁巳嘉平月會稽同學弟魯超拜掇

今詞初集目錄

卷上

吳偉業 十三首

王彥泓 二首

沈自炳 一首

二首 佚

陳子龍 二十九首

施紹莘 七首

于儒穎 一首

吳剛思 一首

紀映鍾 二首

夏完淳 五首

史鑑宗 一首

賀裳 三首

阮大鍼 二首

徐籀 一首

宋徵璧

一首

張杞

一首

龔鼎孳

二十七首

王屋

二首

尤侗

七首

李昌垣

一首

金俊明

一首

徐士俊

三首

曹爾堪

七首

李雯

十八首

馬壬玉

二首

董漢策

一首

金是瀛

二首

王昊

一首

毛重倬

一首

王士祿

一首

嚴沈

三首

田茂遇

一首

華袞 一首

徐乾學 一首

顧湄 一首

張珠斗 一首

張淵懿 二首

鄒溶 一首

韓雲 一首

宋琬 五首

余懷 四首

姜彥淳 一首

錢繼章 一首

魏學渠 九首

林鼎復 一首

彭而述 一首

沈謙 五首

王士禛 十三首

賀宿 二首

顧景文 一首

萬樹一首

陸次雲一首

韓銓一首

張嵎一首

季振宜一首

李燁一首

趙而忭一首

嚴曾架一首

孫暘一首

沈胤範一首

朱彝尊二十二首

汪煥三首

鄒祗謨六首

胡餘祿一首

吳本嵩一首

華瞻祖一首

毛際可六首

董以寧四首

朱瀾 一首

彭孫適 十首

陳玉璣 一首

徐倬 一首

周在浚 一首

史惟圓 五首

羅京 一首

沈爾燦 三首

潘時升 一首

潘眉 一首

秦篆 二首

張台柱 三首

陳大成 一首

駱仁埏 一首

沈豐垣 八首

陳世祥 二首

臧眉錫 一首

汪鶴孫 一首

周銘

一首

今詞初集卷上

西神願貞觀梁汾

全選

長白成德容若

吳偉業

夢江南

江南好博古舊家風宣廟乳爐三代上元人手卷四
家中廠盒鬪鷄鍾

又

江南好舊曲話湘蘭薛素彈丸豪士戲王微書卷道

人看一樹柳摧殘

浣溪沙

斷頰微紅眼半醒
背人驀地下堦行
摘花高處賭身輕
細撥薰爐香繚繞
嫩塗吟紙墨欹傾
慣猜閒事爲聰明

又

一斛真珠孔雀羅
湘裙窄地錦文鞞
紅兒進酒雪兒歌
石黛有情新月皎
玉簪無力暖雲拖
見人先唱定風波

西江月

烏鵲橋頭夜語櫻桃花下春愁廉纖細雨綠楊舟
閣玉人垂手紅袖盈盈粉淚青山翦翦明眸今宵
好夢倩誰收一枕別時殘酒

臨江仙

過嘉定感懷侯研德

苦竹編籬茅覆瓦海田久廢重耕相逢還說廿年兵
寒潮衝戰骨野火起空城門戶凋殘賓客在淒涼
詩酒侯生西風又起不勝情一篇思舊賦故國與浮
名

金人捧露盤 觀演秣陵春

記當年曾供奉舊霓裳嘆茂陵遺事淒涼酒旗戲鼓
買花簪帽一春狂綠楊池館逢高會身在他鄉喜
新詞初填就無限恨斷人腸爲知音仔細思量偷聲
減字画堂高燭弄絲簧夜深風月催檀板顧曲周郎

滿江紅 金陵

滿目山川那一帶石城東冶記舊日新亭高會人人
王謝風靜旌旗仄步壘月明鼓吹秦淮夜算北軍天
塹隔長江飛來也 暮雨急寒潮打蒼鼠窺宮門瓦

看雞鳴埭下射雕盤
馬庾信哀時惟涕淚
登高却向西風灑
問開皇將相復何人
亡陳者

又 蒜山

沽酒南徐聽夜雨
江聲千尺記當年
阿童東下佛狸
深入白面書生成
底用蕭郎裙屐偏
輕敵笑風流北
府好談兵參軍客
人事改寒雲白
舊壘廢神鴉集
儘沙沉浪洗斷戈
殘戟落日樓船鳴
鐵鎖西風吹盡
王侯宅任黃蘆苦
竹打寒潮漁樵笛

又 偶感

詩酒溪山足笑傲終焉而已回首處亂雲殘葉幾篇
青史昔日兒童俱老大同時賓客今亡矣看道旁爭
羨錦衣郎曾如此 遭際盛聲名起跨燕許追蘇李
苟不知一事吾之深恥年少卽今何所得孝廉聞一
當知幾論功名消得許多才偶然耳

木蘭花慢

湖上

西湖花月地櫻筍熟鰕魚肥記粉袖銀箏青簾西舫
烟柳春堤驚風一朝吹散嘆西興兵火渡人稀白髮
龜年尚在青山賀監重歸 恰相逢紫蟹黃雞猶唱

縷金衣奈狂客愁多秋娘老去木落烏棲無情斷橋
流水把年光流盡付斜暉世事浮生急景道人抱膝
忘機

風流子

咸陽三月火新宮起傍鎖舊莓墻見殘甃廢磚何王
遺構荒薺衰草一片斜陽記當日文華開講幄寶地
正焚香左相按班百官陪從執經橫卷奏對明光
至尊微含笑尚書問大義共退東廂忽命紫貂重召
天語琅琅賜龍團月片甘瓜脆李從容晏笑拜謝君

全言不集
王十八年來如夢萬事淒涼

賀新郎

萬事催華髮論龔生天年竟天高名難沒吾病難將
醫藥治耿耿胸中熱血待灑向西風殘月剖却心肝
今置地問華陀解我腸干結追往恨倍淒咽 故人
慷慨多奇節爲當年沉吟不斷草間偷活艾炙眉頭
爪噴鼻今日須難訣絕早患苦重來千疊脫屣妻孥
非易事竟一錢不直何須說人世事幾完缺

王彥泓

滿江紅 憶

眼角眉尖誰會得這場拋散怕向那定情簾下訴愁
窗畔幾度卸妝垂手望無端夢覺低聲喚猛思量此
際正天涯啼珠濺欲寄語加餐飯難囑付魚和雁
隔雲山牽挽寸心如綫善病每逢春月臥長愁多向
花前嘆况如今憔悴去儂邊何曾慣

念奴嬌

茉莉改劉叔安詞

簾櫳午寂正陰陰窺見後堂芳樹綠遍千叢花事杳
忽接瓊葩丰度豔雪肌膚蕊珠標格銷盡人間暑還

憂風日曲屏羅幕遮護
長記歌酒闌珊微聞暗麝
笑覓衣沾露月沒闌干天似水相伴謝娘窗戶浴後
輕鬟涼生滑簟總是牽情處惹人幽夢枕邊零亂如
許

沈自炳

玉樓春

盼盡玉郎離別處空剩紫騮芳草路年年同嫁與東
風只有小樓紅杏樹
愁病懨懨覓欲去一霎芭蕉
寒響聚空嗟薄命玉容人直得數聲秋夜雨

永遇樂

中秋大雨

三五中秋一場敗興雨淋風裂問訊嫦娥今宵此際
幽悶如何說輝寒玉臂光凝翠黛長是孤眠時節任
淒涼兔掩蟾遮免照半床愁髮晚來粧了插花看
鏡恍似身臨瑤闕燭滅香殘暗風吹雨竟夢空淒切
月宮淡鎖桂輪何處莫被愁人攀折應自恨青天碧
海茫茫奔月

又十六夜

銀漢紅墻浮雲隔斷玉簫吹裂白玉堂前鴛鴦六六
誰與王昌說今宵二八清輝香霧還憶破瓜時節劇
堪憐明鏡青天獨照長門華髮 莫愁未老嫦娥孤
另相向共嗟圓闕長嘆凭闌低吟擁髻暗與陰蛩切
單棲海燕東流水十二金釵敲折何日裏並肩攜
手雙雙拜月

陳子龍

夢江南

思往事花月正朦朧玉燕風斜雲鬢上金猊香燼画

屏中半醉倚輕紅

如夢令

紅燭逢迎何處笑倚玉人私語莫上軟金鈎留取水
沉濃霧難去難去門外尺淡花雨

憶秦娥

柳絮

春漠漠香雲吹斷紅文幕紅文幕一簾殘夢任他飄
泊輕狂無奈東風惡蜂黃蝶粉同零落同零落滿
池萍水夕陽樓閣

畫堂春

雨中杏花

輕陰池館水平橋一番弄雨花梢微寒着處不勝嬌
此際覓消 憶昔青門堤外粉香零亂朝朝玉顏寂
寞淡紅飄無計春宵

阮郎歸

朱欄清影下簾時泠泠修竹低滿園空翠拂人衣流
鶯無限啼 蓮葉小荇花齊雨餘雙燕歸紅泉一帶
過橋西香銷午夢微

山花子

楊柳迷離曉霧中杏花零落五更鐘寂寂景陽宮外

月照殘紅 蝶化綵衣金縷盡 蟲銜画粉玉樓空 惟
有無情雙燕子 舞東風

柳稍青

繡嶺平川漢家故壘 一抹蒼煙陌上香塵樓前紅燭
依舊金鈿 十年夢斷嬋娟回首處 離愁萬千細柳
新蒲昏鴉暮雁芳草連天

少年遊

滿庭新露浸花明 攜手月中行 玉枕寒淡冰綃香淺
無計與多情 奈他先灑離時淚 禁得夢難成 半晌

歡娛幾分憔悴重疊到三更

醉花陰

繡幕屏山紅影對兩點愁眉黛消息又黃昏立遍蒼
苔賺得心兒悔一縷博山庭院內人在秋千背夜
久落春星幾陣東風殘月梨花碎

探春令

上元雨

寒梅香斷滿簾風庭院春無主火微紅明滅紗窗裏
知有玉人低語年時花月相逢處隔小橋幾許想
今宵獨剔銀燈和淚多了黃昏雨

南歌子 春月

淡淡花梢去融融翠影流碧天無際迴含愁畱得一
庭春露上簾鈎 風軟飛紅靜煙淡嫩綠收爲誰相
送海西頭應有玉簫吹斷鳳凰樓

望遠行 人日

曉日淡沉画閣眠銀剪閒開半圓小屏風上又新年
綺羅香襯落金鈿 思往事恨絲絲怕說梅妝柳烟
裁成華勝寄誰邊一春常是淚花前

浪淘沙

清淺木蘭舟春思悠悠暮雲凝碧倚粧樓當日画堂
紅燭下戲與藏鈎何處問重遊好景難留誰家花
月惹人愁總有笙歌如夢也別樣風流

小重山

曉日重簾掛玉鈎鳳凰臺上客憶同遊笙歌如夢倚
無愁長江水偏是愛東流荒草思悠悠宮花飛不
盡覆芳洲臨春非復舊妝樓樓頭月波上對揚州

臨江仙

小春

西風料峭黃花暮斜陽一角紅樓羅衣添得又還休

銀蟬寒卸甲寶鴨暖藏鈎
忽憶軟金杯自捧重携
殘燭淹留於今玉漏漫悠悠
不知千里夢無奈五更
愁

蘇幕遮

寒食

冷風尖清夢杳柳蕩花飛總爲愁
顛倒勾較斷腸無
一了細雨連天排演黃昏早
繡原長青塚小重問
幽泉可照紅裳曉
地下傷春應不老香
菟依舊嬌芳草

蝶戀花

落葉和李舒章

金井雕欄蛩語歇，獨上空階。蔌蔌驚羅襪，滿院西風。
人影絕，亂鴉啼斷寒枝月。今夜霜華樓外滑，一曲
屏山遮過。燈明滅，幾陣紗窗聲不輟。夢中又到愁時
節。

又

裊裊花陰羅襪軟，無限芳心。初與春消遣，小試嬌鶯
纔半啣。海棠枝上春風淺。一段行雲何處剪，掩過
雕欄送影。湘裙展，隔着亂紅人去遠。画樓今夜珠簾
捲。

青玉案

青樓惱亂楊花起能幾日東風裏回首三春渾欲悔
落紅如夢芳郊似海只有情無底 華年一擲隨流
水留不住人千里此際斷腸誰可比離絃催散小窓
惜別淚眼闌干倚

又

海棠枝上流鶯囀試小立春風面細草凌波紅一線
碧雲凝照綠楊零亂重鎖淡淡院 甘蔗翠滴當心
捲寫徧相思空自遣歸去枕函曾夢見一天星月滿

庭風露吹落梨花片

天仙子

古道棠梨寒側側子規滿路東風濕留連好景爲誰
愁歸潮急暮雲碧和雨和晴人不識北望音書迷
故國一江春水無消息強將此恨問花枝亂紅積鷺
如織我淚未彈花淚滴

又

十二画屏圍楚岫一縷水沉携滿袖小桃纖甲印流
霞聽玉漏人歸後兩點橫波微暈透荳蔻梢頭春

尚瘦雲膩煖金燈下
溜鏡臺斜背解羅衣
芙蓉繡生香扣寶
袜酥胸紅影皺

江神子 病起春盡

一簾病枕五更鐘
曉雲空捲殘紅
無情春色去矣幾
時逢添却千行清淚也
畱不住苦匆匆
楚宮吳苑
草茸茸戀芳叢
繞游蜂料得來年
相見画屏中人自
傷心花自笑憑燕子
舞東風

千秋歲

章臺西弄纖手曾攜
送花影下相珍重
玉鞭紅錦袖

寶馬青絲鞵人去後簫聲永斷秦樓鳳
茵苜雙燈
捧翡翠香雲擁金縷枕今誰共醉中過白日望裏悲
青塚休恨也黃鸝啼破前春夢

驀山溪

碧雲芳草極目平川繡翡翠點寒塘雨霏微淡黃楊
柳玉輪聲斷羅鞵印花陰桃花透梨花瘦遍試織織
手 去年此日小苑重回首暈薄酒闌時擲春心暗
垂紅袖韶光一樣好夢已天涯斜陽候黃昏又人落
東風後

滿江紅 午日

槐院淡陰亂花影半鈎羅襪逞鮫綃香透蘭湯脂滑
百草分來紅袖滿雙蛾飛上湘裙褶更亭亭無語照
池塘愁時節 傷心事人難說芳年恨經今切且玉
簫金管画船明月微雨樽前冰簟冷輕風扇底蓮歌
歇問多情誰似五絲長同千結

滿庭芳

紫燕翻風青梅帶雨共尋芳草啼痕明知此會不得
久殷勤約畧別離時候綠楊外多少銷魂纔提起淚

盈紅袖未說兩三分
紛紛從去後瘦憎玉鏡寬損
羅裙念飄零何處煙水相聞欲夢故人憔悴依稀只
隔楚山雲無過是怨花傷柳一樣怕黃昏

念奴嬌

和宋尚木春雪咏蘭

問天何事到春深千里龍山飛雪解珮凌波人不見
漫說蕊珠宮闕楚殿煙微湘潭月冷料得多攀折媽
然幽谷只愁又聽啼鴉 當日九畹風光數莖清露
纖手分花葉曾在多情懷袖裏一縷同心千結玉腕
香消雲鬟霧掩空贈金跳脫洛濱江上尋芳重惜佳

節

二郎神 清明

韶光有幾催遍鶯歌燕舞醞釀一番春穠李天桃嬌
妬東君無語多少紅顏天上落總添了數抔黃土只
是對年年芳草依舊江山如許 何處當年此日柳
堤花墅內家妝牽帷生一笑馳寶馬踏青原墓玉雁
金魚誰借問空令我傷今弔古嘆繡嶺官前白髮吞
聲漫天風雨

施紹莘

夢江南

人何處人在碧雲樓
雨雁帶愁橫
浦樹風花驚
夢撲簾鉤應是倦梳頭

又

人何處人在木蘭船
輕雨等烟籠
舊事暮山如夢隔
前緣應是裊紅綿

長相思

晚妝時晚酣時
這段風流知對誰
又對伊
惱心期
算心期
獨擁寒衾
多麝臍
燭花殘一枝

浣溪沙

晚晴

雨過雲頭出淡虹
小桃收淚見東風
花間忽憶舊行踪
有夢也如風
滾絮望人頻似鳥
窺籠
一年春意又匆匆

重疊金

一燈遙夜陪孤寢
好香煖浸鴛鴦枕
殘月小窗楞花
枝與夢橫
半牀衾似鐵
正是人愁絕
淚眼不分明
燈花罨盞青

憶秦娥

添寂寞梅花月下微微落
微微落畫簷頭上一聲風
鐸驚棲庭樹啾啾雀
霜花暗綴簾衣薄
簾衣薄夜
淡香靜背燈人覺

鷓鴣天

緊閉重門茉莉香
薄雲和月淡鷺黃
賭裝蟾子占新
寵閒趁螢光取嫩涼
登小閣轉回廊
忽驚紅燭馬
嘶忙盡停牕
下勻眉手扶取門前劇醉郎

于儒頴

浣溪沙

一片心情眼底柔倦容疎態越風流未經惆悵不知
愁 鴛譜怪來鍼綫減工夫強半爲梳頭日西初見
下妝樓

吳剛思

過秦樓

湖上餞春寄題遠山閣倚宋人韻

暖暖寒寒晴晴雨雨閒煞兩堤芳草借柳維船尋花
蹴徑又是輕風拂曉試問昨夢誰邊油壁西陵荒涼
蘇小嘆流光一霎未到五更春餘多少 空自恨誤
却歸期見春歸去却又替春煩惱廢沼殘蛙空梁舊

今言初集 卷一
燕門掩落紅誰掃長怕鏡裏樽前未免有情與春俱
老囑春歸好向故園認我遠山青遶

紀映鍾

清平樂

寒烟枯樹一杖孤山路隔溪黃葉無尋處莫被梅花
香誤閒亭坐到斜暉鳥下空巖翠微却憶山中處
士當年自掩柴扉

滿江紅

被襖才過新水淨練痕斜曳歎甕牖韶光悄駛暮年

尤切何處玉簫吹子夜不堪岸柳飛晴雪看井闌百
尺轆轤催何時歇 春明外如雲陌華清內如鉤月
儘六街塵夢把人翻閱到日藏烟餉粥冷歸途汗血
桃花熱勸先生且小住爲佳徐徐說

夏完淳

浣溪沙

柳色淡淡聽曉鶯玉闌愁倚夢分明閒花斜落小釵
橫 蝴蝶前生原夜合楊花身後作浮萍東風輕薄
誤多情

一斛珠

暮蟬啼後闌干獨倚芙蓉扣
丁丁滴滴添銅漏
萬里輕雲一點清光逗
天涯人遠愁時候
乍晴乍雨催
人瘦新愁不許春山鬪
酒醒荷香昨夜相思透

一剪梅

柳

無限傷心夕照中
故國淒涼剩粉餘紅
金溝御水自西東
昨歲陳宮今歲隋宮
往事尋思一餉空
飛絮無情依舊煙籠
長條短葉翠濛濛
纔過西風又過東
風

天仙子

紫玉轆轤青錦索金井梧桐寒寂寞霜羈馬上冷遊
郎花下約燈前諾人在画樓牽翠幙無奈愁人春
夢惡淚點羅衫春袖薄一江煙草亂相思當初錯而
今莫雁又不來花又落

滿庭芳

鶯轉花更蝶圍香國重闌朝暮愁歸墜鞭人瘦怎禁
小風吹不爲春醒懶起分香處燕子來窺芙蓉帳餘
烟已渺紅淚染離袿相逢何處也難尋丹棘欲寄

瓊蕤恐蕭郎別後淺淡愁眉賸有菱花一半已不是
那日崔徽長堤路桃花帶雨柳眼自含悲

史鑑宗

南鄉子

楓橋

風月吳儂綠楊門巷小橋通一葉蘭舟隨處艤烟裏
落日樓臺歌管起

賀裳

眼兒媚

半竿殘日下西牕倦繡出金堂架移簾內絨拖髻畔

花裊斂傍 驀然欄角回頭望背底立蕭郎低聲笑
問何時潛入真太猖狂

眉峯碧

徹夜愁無寐欲起翻成睡分明又到鏡臺前爲伊寫
雙蛾翠 紫桂香浮砌手折簪濃髻道金風最是不
宜人月中露下休沉醉

鷓鴣天

樹影爐烟裊畫簾銀屏背倚小鬟愁初籠蟬鬢宜花
壓未寫蛾眉待筆添 吹玉笛弄鵲絃旋移針線繡

牀前朝來春夢惜騰處正在花陰學簸錢

阮大鍼

菩薩蠻

春至年年韋杜曲芳草無心裙帶綠風冷酒初醒琴
心瘦長卿藥裹封蛛網愁入眉峯上小拜向蓮幢
佛前燒炷香

減字木蘭花

春光漸老流鶯不管人煩惱細雨窗紗淡巷清晨賣
杏花眉峯雙蹙畫中有箇人如玉小立紅簷待燕

歸來始下簾

徐籀

法曲獻仙音

池泛青萍林拋紫箬薄暑濃陰池閣妬雨無情頓將
春色無端放教閒却看燕剪鶯捎處殘紅盡零落
悔前錯不早知命中窮達蝸角事回眼總成沙漠冷
落此間人教塵封當日簾幙中酒迷花便連年空恁
耽閣怕松心竹性也做柳綿飄泊

宋徵璧

醉花陰

荳蔻梢頭花半吐
欄畔霏微雨
一炷水沉香
六曲銀屏人在淡淡處
綠紗牕
透春鶯語
密約防鸚鵡
無語暗銷魂
翠幕朱樓橫鎖
相思去

張杞

醉公子

亂綰秋雲髮
懶步生塵鞵
金鴨博山籠
啼痕一線紅
何限王孫處
白苧輕衫污
怕展曉屏開
開山入眼來

龔鼎孳

長相思

似多情似無情玉豔心情是怎生春衫話不明
長
歌行短歌行多少柔腸攬掇成流鶯只一聲

醜奴兒令

韋曲城南天尺五花底春星玉笛微停唱到消
翫不
忍聽
並肩一刻濃香坐消受傾城央及流螢莫遣
銀燈近画屏

又

歡場誰記多情句四海知音紅淚難禁病後人憐風
露淡 繡裙團扇當年事的酸心別恨侵尋耐得
雕闌玉漏沉

西江月 渡江

箭打亂潮柔艚鴉翻古渡青旗春江玉雪鑿鬚眉俊
眼相看似此 長劍錦驄香夢寶釵鈿瑟男兒人言
無淚灑離時不稱英雄淚耳

浪淘沙

翠憶報花來春恨重裁西風吹夢上妝臺舊夢不留

新夢遠影裏徘徊 客思遶秋苔 鐵馬驚開銀箋冷
落薛濤才細展紅香溫麗句一字千猜

鵲橋仙

樓晤

紅牋記注香糜勻染生受綠蛾初画挑琴擘阮太多
能自寫影養花風下 月低金管帶飄珠席兩好心
情難罷芳時不慣是烏啼願一世小年爲夜

南鄉子

和熊雪堂先生

槐影落宮牆寶瑟瑤笙恨杳茫負了多情簾外燕昭
陽不見臨春鏡裏妝 一月底問玄霜遼后臺邊鈿粉

荒玉漏不知金井換悲涼只記長門一樣長

小重山

長板橋頭碧浪柔幾年江表夢恰同遊雙蘭又放小
簾鈎流鶯熟噉啜一低頭 花落後庭秋蔣陵煙樹
下有人愁玉簫凭倚賸風流烏衣燕飛入舊紅樓

臨江仙

借內人湖舫送春

誰遣封姨吹画櫂晴湖蹴作濤聲淺寒羅袖最分明
催花落盡此別太生生 薄福東君應有悔一春雲
幔風旌雙蛾小皺縠紋平夕陽無賴不管鈿釵橫

青玉案

虎丘

金閨箇是迷香路。又月底移船去。風定石坪笙管度。
吳王虹劔貞娘珠粉兒女英雄處。草痕短簿荒祠。
暮入望寒山夜鐘。句自負多情天亦許。要離年逞館
娃人去一陣催花雨。

祝英臺近

家信

綠烟橫蘭漿渡金犢偃淮浦細草春寒過盡斷腸雨
望中雀扇雲衣溫存無據枕邊心關山畱住莫輕
覷柳外無限長亭朝暮背人數河上雙魚聽否咒花

語更愁香夢來尋重添離處却也遣病覓隨去

滿江紅

拜岳鄂王墓敬和原韻

鐵騎春寒英雄恨何時始歇對萬古日飛潮射抗忠
比烈玉劒氣橫南渡水靈旗夜捲朱僊月念青衣行
酒是何人關情切 金牌憤風波雪社稷事東窗滅
歎一堆黃土河山頓缺五國冰猶封馬角九天雨更
吹龍血憶當年壯髮怒雲高搖雙闕

滿江紅

拜于忠肅公墓

萬里神州當公世三光幾歇奉社稷仰迴天步義聲

霆烈翠輦不移螭陛草丹心長照龍堆月置死生成
敗付蒼穹孤忠切 弓烏恨須臾雪徐石輩紛紛滅
視大名諸葛旂常無缺策定抗辭霽武賞事完補灑
攀車血使非公母論奪門功誰陵闕

滿庭芳

韋公祠看西府海棠時三月十八日

紅玉籠雲胭脂侵雪兩行擷豔驚奇乳鶯聲裏香雨
一庭滋繡帶畱僊小立絳霞畔飄送瓊璣銷魂處如
嗔欲笑狂眼任紛披 珠鈿芳草路憑空十載拋撇
幽姿那堪過天寶再趨花期落日華清似夢絃索冷

妃子容衰無情甚東風賣眼看殺爛柯棋

燭影搖紅

吳門元夜值雨

花信爭傳玉鈎草色寒猶淺雨絲風片帶紅愁誰記
張燈宴粉霧檀雲暗捲伴名香銀梅小苑画橋烟暝
酒市人歸寂寥絃管金翠吳宮燭龍幾照朱門換
青驄紈扇憶長安人醉雕闌遠十里香塵不斷惜流
年歡長漏短月迷江館客散旗亭一行春雁

萬年懽

癸未春作

一笑東風喜寒梅尚繁香散瑤雪携手花前重見酒

杯豪發鐵石銷磨未盡算只有風情癡絕生拋撇瘴
戟蠻裝更央珊瑚枕埋骨而今虎鬚怒歎料天荒地
老比翼難別絡粉調笙還讓引裾人物儘取頭廳重
印宵換却織織羅鞵甘心署錦隊鉗奴五湖編管烟
月

念奴嬌

和吳修蟾雨中春恨

薄寒吹酒中春愁兩點珊瑚鈎眉削樓外濃陰飄遠岫
遮斷芙蓉屏脚玉雁風低金猊枕瘦放下丁香幕爲
花長嘆煙林一片空廓眼見飛絮遊絲殷勤相傍

軟到鞦韆索爭悵佳時容易度誰信懨懨耽閣夢淺
無痕憐淡似病雪打梨雲惡關情如許莫教燕子偷
覺

又

凭樓無賴受東風冷暖瞞人情緒一夕梅萼芳霧散
把酒頻澆黃土露金鈴煙籠粉幔似聽醪醑語啼
鵲初瘦月高誰作花主分付弱柳千條小闌干外
替兩眉辛苦薄醉濃香簾幙捲又是流鶯梳羽玉管
橫吹霞綃遍寫怕到酸心處五侯亭館當年何限歌

舞

木蘭花慢

鏡中腸斷絕愁萬種不分明正柳憶烏啼雲迷馬角
惆悵前生東風恰吹恨到又酸酸楚楚兩眉橫怪底
簷花如雨杜鵑長是吞聲 昭陽粉黛記將迎翠袖
五銖輕忽淒管催霜繁笳沸月好夢難成休言画工
粧點便淺啼微笑也心驚慚愧紅塵斷梗負他碧澗
香羹

玉燭新 上元獄中寄憶

天街風定後想画鼓雲繁絳籠星驟虎城豹柝輕烟
外逗出銅龍春漏侯家錦毯醉不了珠場花候誰信
道青鬢孤臣今朝雪霜盈袖 依稀燭下屏前有翠
靨綃衣月明安否小眉應鬪恨咫尺不見背燈人瘦
香柔粉秀猛絆得英雄搔首千古意惟許冰絲平原
對繡

綺羅香

同起自井中賦記

弱羽填湖愁鵲帶血凝望宮槐煙暮並命鴛鴦誰倩
藕絲畱住辜杜葑正則懷湘珥瑤碧宓妃橫浦誤承

受司命多情一雙喚轉斷腸路 人間兵甲滿地辛
苦蛟龍外前溪難渡壯髮三千黏濕遠山香嫵憑蝶
夢吹恨重生問竹簡殉花何處肯輕負女史萋弘止
耽鶯燕語

沁園春

題陳其年烏絲集

髯且無歸縱飲新豐歌呼拍張記東都門第賜書仍
在西州姓字複壁同葺萬事滄桑五陵花月闌入誰
家俠少場相憐處是君袍未錦我鬢先霜 秋城鼓
角悲涼暫握手他鄉似故鄉况竹林賓從烟霞接軫

今言不集 卷一 三二
雲間伯仲宛雒褰裳煖玉燕姬酒錢夜數綰鬢風能
障綠楊持此闕當清平絲管爛醉沉香

賀新郎 和其年

玉笛西風發送賓鴻一城砧杵千門宮闕秋滿桑乾
沙岸曲曲蘆花飛雪又報道今番圓月翳宦薄遊
俱失意詫長楸衣馬多如髮空刺促錐刀末 小山
叢桂難攀折眼中過紛紛項領汝曹何物只有窮交
堪對酒况是江東人傑任夜夜蘭釭明滅作達狂歌
吾事足問人生幾斗荆高血行樂耳苦無益

十二時

隔江樓月湧銀濤偏是紅綿難洗正絮撲棠舫星稀
蕙幄慙慙花氣中酒心期垂簾時候旅館疎砧起殘
堞外一片荒雞半入画笳吹到孤眠人耳 幽夢中
重尋後會豈似麝裙同繫笛瘦銀鞍釵斜玉鏡寸寸
含情地別路千萬疊長亭只在望裏 暗忖量藍橋
約近領畧三生恩意兩字驪歌暫時南浦豈負濃香
被宛轉官柳側終憐好春輕棄

大酺

和秋岳春憶

憶柳如烟烏啼月江左瑯琊何處高樓紅樹裏有銀
箏紈扇與花相妬六代鶯聲三山草色曾記遊人來
否勝侶隨雲散悔東華走馬此行原誤更風滿敗梧
日斜橫笛燕穿飛絮包胥無一旅看公等歌舞誇
南渡爲問取夷吾達矣祖述何如繡芙蓉那能頻顧
夢逐江流去還懊惱數峯遮住料難到家山路菱花
憐我蕭索長卿如故倩誰百斤買賦

玉女搖仙珮

志喜用柳耆卿佳人韻

青天萬里忽下檀雲送到虬幢鮫綴六代金霞三春

鶯粉拾得有情佳
雨便倩秋蟾比怪
年年碧海成雙
非易儘疇昔羅裙
回簾無數消覓見
面都已相逢恰
今宵一世團圓花
明月媚兼有九霄
玉珮五夜香
爐好景安容拋棄
斗帳微酣珠縉並
熱柳毅龍宮輸
美紫袖同心倚任
消受南國知名才
藝邨忍忘燈前
却扇笛邊沾酒上
樓歡意三生誓
玄霜碾入鸚鵡被

菩薩蠻

摩訶菴杏花下有感

蔚藍一片山如
泫粉紅花底看
人面玉笛怕花
飛花開人莫歸
當時花下客把
酒斜陽立今日
對斜陽

與花俱斷腸

王屋

破陣子

寄南屏印公

二十年來湖上都無老子行蹤不識斷橋橋下水不
識孤山山頂松與先同不同便擬一瓢從汝往來
南北高峯看遍西谿梅與竹聽遍東林磬與鐘洗將
塵土容

滿庭芳

秋橘三千春桑八百以茲歸老如何公言則爾吾願

不須多負郭溪田二頃墻圍竹四壁青蘿兒能讀妻
能夜織容我放狂歌 婆娑堯舜日家無征戍盜息
鳴戈養一羣嬌鴨幾對新鵝釣月篷開點點晴持笠
雨卽披簑時方泰丁男並舉孝弟力田科

尤 侗

重疊金

香蘭笑向銀屏吐小蠻起作迴風舞人靜綠紗空美
人春夢中 簫聲催月白柳帶籠烟碧芳艸滿江南
相思一夜添

眼兒媚

水晶簾下看梳頭宛轉小眉修自然宮樣遠山欲笑
新月如鈎絳仙何用供螺黛淡掃恰風流張郎多
事橫添一筆帶出閒愁

夢江南

燒香曲

清早起天色趁新晴飛鬢斜拖雙燕翠画衣薄襯小
鴉青素裹玉丁丁回鏡照時樣稱人情多分撩教
遊子看私先央及侍兒評公論是輕盈

臨江仙

少日揮毫兼躍馬錦裘風雪行邊十年回首鬢蕭然
蹇驢花下路短笠渡頭船 憑寄壯心歌舞地綠尊
翠袖紅顏不然散髮事金僊蒲團香影裏橫槊自參
禪

滿江紅

贈余澹心和梅村

對酒當歌君休說麒麟圖画行樂耳柳枝竹葉風亭
月榭滿目山川汾水雁半頭霜雪燕臺馬問何如變
姓隱吳門吹簫者 蘭亭襖香山社桐江釣華林射
更平章花案稱量詩價作史漫啣牛馬走詠懷却喜

漁樵話有孟光把盞與齊眉皋橋下

百字令

贈吳梅村先輩用大蘇韻

江山如夢歎眼前誰是舊京人物走馬蘭臺行樂處
尚記紗籠題壁椽燭衣香妙年情事頭白今成雪杜
陵野老風流獨數詩傑更聽法曲淒涼四絃撥斷
清淚如鉛發莫問開元天寶事一半曉星明滅我亦
飄零十年湖海看雨絲風髮何時把酒浩歌同送明
月

賀新郎

塞上

天末盧龍道看敷分山崖聳峙河流低遶極望長城
煙一抹但見黃榆白艸又添得離鴻縹緲寒月如霜
沙似雪想當年有客傷心早重画出邊愁稿 短衣
自倚高樓嘯弔西風一盃殘酒淚痕多少漫譜明妃
出塞曲不見玉關人老更減盡英雄懷抱剩有琵琶
渾不似倩廬兒彈出涼州調公莫舞烏啼了

李昌垣

踏莎行

翠幕烟沉珠簾月小枝頭未雪梅開早凭闌無計遣

新愁夜烏啼罷歸鴻杳
遠杵敲寒微燈破曉漏聲
滴盡鐘聲悄香殘酒醒不成眠
流蘇莫怨天涯繞

金俊明

憶皇州

春日感舊

節近清明花事逼信斗酒雙柑遊屐射眼汀光照眉
山氣一片江南碧不堪追憶虹裊梁高珠翻井滿
何時重領帝京風色往事分明底隔年華二十悵悵
淡烟冪歷芳艸連天織

徐士俊

卜算子

香謝玉如烟調改絃俱靜巧畫秋眉沒處看柳外嬋
娟影紅淚幾時銷素約誰人省不寐緣何得夢來
一束蘅蕪冷

好事近

翦斷海棠絲拋却春心不管楊柳那知人意惹鶯兒
悽惋臉紅眉翠不堪銷擁着半牀懶二十四番花
信數春宵愈短

憶秦娥

衾兒冷秦樓夢破紅窗影紅窗影捲簾牽幔少年心性
鴉黃燕紫宜春勝看看又與花朝近花朝近剪刀
牙尺一番排整

曹爾堪

好事近

斯世少英雄應笑成名豎子衰草夕陽彌望弔金元
遺壘霜橋孤月照空囊隔樹亂煙起旅館蕪菁低
照讀數行殘史

朝中措

龍潭驛懷舊

驚濤吹簸老龍愁暮雨且停驂紅樹斜分建業青山
多在江南 遠檣排漢亂帆擊汰百尺空潭一曲渭
城歌罷酒樓誰是何戡

鷓鴣天

送客之金陵

羅綺香殘舊院空石城橋畔掛晴虹柔情祇在琴心
裏別意難消燭淚中 江水白岸花紅小樓山色六
朝同莫愁家近頻來往蘭槳輕隨燕子風

青玉案

霜餘淨碾遙天碧聽落葉鳴虛磧疎樹倦鴉寒影隻

今朝才見瘦筠斜處露出梅花白
敝裘補綻年年
客駿馬春衫復何益五柳淒清陶令宅
黃河風雪榮
陽戰壘驢背思疇昔

風入松

綠楊影裏曉雲酣柔緒浴春蠶
獨憐堤草平如剪尋
芳信荳蔻初含醉眼微留雙暈粉香纔卸單衫
碧
天如水水拖藍花氣透疎簾
濤箋錦字何由寄彈紅
淚小印親函癡夢渾如燕子輕身飛到江南

念奴嬌

孤舟初發正嚴霜，伴雪布帆如紙一。派殘雲縈別恨，
愁向青山隱几。晚圖黃花小槽紅酒，客路誰同醉。蒯
緱黯澹，自將管樂爲比。遙念旅宿新寒，丹陽古道，
老樹酣青紫。戍鼓沉沉天未曉，殘月模糊映水。白紵
談兵青燈讀易，漫灑英雄淚。啼烏成陣，石頭城外潮
起。

一萼紅

盼芳洲有白蘋幾許，分遶綠溪幽樹。老葦鴉蘆溪避，
雁漁歌喚起沙鷗輕夢。隨一枝短檣睡過了，楓葉伍

塘秋怪殺西風故將殘柳縮定閒愁 堪歎駒陰如
駛挽長江逝水佳麗難留雲散巫峯雨昏湘浦覓銷
燕子樓頭親曾見俚紅擁翠就今日霜鬢對寒篔簹
數當年豪舉分付東流

李 雯

謁金門 紅葉

青楓浦染出空江天暮隔岸胭脂新雨度小樓腸斷
處 疊疊亂紅盈路又被西風吹去翠袖拾來看幾
度欲題無一語

清平樂 秋曉

月殘銀井涼，夢驚香醒未捲羅幃。燈炯炯露葉啼紅，
滿徑起來，獨上銀鈎。初寒先入青樓，翠鎖不禁濃
黛。金風又拂篔簹。

阮郎歸

滿簾暮雨對青山，樓高香袖寒。綠帆遙落水西灣，銀
箏無意彈。金鴨冷，淚珠殘。一庭紅葉翻鷓鴣，飛去
又飛還。人如秋夢闌。

又 秋曉

夕陽庭院鎖芭蕉晚涼和雁高芙蓉紅褪滿江湖金
塘知路遙 羅袖薄暖香消歌梁空燕巢添衣小立
紫闌橋淒清聞鳳簫

少年遊

綠窗煙黛鎖梅梢落日近橫橋玉笛纔聞碧霞初斷
羸得水沉銷 口脂試了櫻桃潤餘暈入鮫綉七曲
屏風幾重簾幙人靜画樓高

又代女郎送客

殘霞微抹帶青山舟過小溪灣兩岸蘆乾一天雁小

分手覺新寒
今宵雙月照燈闌
人是暮愁難半枕
行雲送君歸去好
夢憶江干

西江月

梅花

素手淡知花重羅幃更奈香寒
玉笙吹徹暮憑闌
消得東風一半
淡月黃昏常待清霜曉
夢無端
水精簾外影相看
不被紅雲遮斷

醉花陰

重陽

心字煙含盤篆縷鬢影清香袖一晌
又重陽滿目雲
山不待人歸後
江天落雁垂垂久
好景知依舊不

是怨黃花只爲離人誤得黃花瘦

南歌子

霜痕隨碧甃素縷斷銀餅香消翠被五更清慣是獨
眠人起見壺冰 濕雲粘指凍煖筆畫眉輕菱花寒
湛遠山青記得當年携手近窗櫺

南鄉子 冬詞

斗帳欲溫香池上冰紋樓上霜半鞦韆綠雲無意縮思
量翠袖淡淡玉指長 斜日又西黃昏窄銀屏小洞
房折得梅花和影瘦淒涼簾幕風高斷雁行

虞美人 春雨

廉纖斷送茶蘼架衣潤籠香罷鷓鴣啼處不開門生
怕落花時候近黃昏 艷陽慣被東風妬吹雨無朝
暮絲絲只欲傍粧樓却作一春紅淚滿金篝

臨江仙 春潮

一曲画橋春水急綠帆遠掛斜陽誰家艇子近垂楊
杏花新雨後初浴兩鴛鴦 暮暮朝朝來信准教人
無奈橫塘新愁恰與此平量慣隨明月上更弄柳絲
長

蝶戀花 落葉

慘碧愁黃無氣力，做盡秋聲，砌滿欄杆側。疑是紗窗風雨入，斜陽又送棲鴉急。不比落花多愛惜，南北東西，沒個人知得。昨夜小樓寒四壁，半堆金井霜華濕。

又

荳蔻弱垂紅粟小，半整雲鬟，知是傷春了。幸得玉樓香未杳，人間有信傳青鳥。聞說柳梢青渺渺，一翦橫波，如對瀟湘曉。爲語東風吹蝶早，教人着意憐芳。

草

蘇幕遮 枕

翠屏欹羅帳小半鎖香雲自共愁人倒一幅瀟湘圖
未了斜倚金鈿夜夜巫山曉鳳釵寒蓮漏悄獨自
溫存只索和衣抱夢到君邊常草草幾度香銷更有
誰知道

又

花影淡簾額重斗帳微寒一枕香雲擁何事起來常
情忪繡被紅翻顛倒思前夢西樓高香幕迥幾樹

垂楊又被東風送門外鶯啼芳草動獨自開奩檢點
釵頭鳳

江神子

一篙秋水淡芙蓉晚來風玳雲重檢點幽花斜綴小
窗紅羅襪生寒香細細憐素影近梧桐 棲鴉零亂
夕陽中歎芳叢訴鳴蛩半捲鸞箋心事上眉峯玉露
金波隨意冷愁滅燭聽歸鴻

風流子

送春同芝麓

誰教春去也人間恨何處問斜陽見花褪殘紅鶯捎

濃綠思量往事塵海茫茫芳心謝錦梭停舊織麝月
嬾新妝杜宇數聲尚餘驚夢碧欄三尺空倚愁腸
東君拋人易回頭處猶是昔日池塘畱下長楊紫陌
付與誰行想折柳聲中吹來不盡落花影裏舞去還
香難把一樽輕送多少暄涼

馬壬玉

南鄉子

香夢赴高唐喚起惺忪睡海棠花雨一身簾半卷商
量雙燕歸來話正長愁黛向橫塘不是思郎是恨

言不集
郎萱草宜男蓮並蒂鴛鴦對此爭教不斷腸

小重山

霧裊烟拖卸髻鬟兩眉峯澹澹夕陽山五銖衣薄覆
金環翳銷苑香藕雪彎彎 鍼線晚來閒笑勾郎並
浴掩雙環明河清淺斗爛斑天孫女將次渡河灣

董漢策

一斛珠

當年落魄江村聽盡荒鷄惡五更茅店霜華薄病馬
凌寒夢到麒麟閣 江南舊路行來錯黃庭一卷閒

臨學神僊傳裏真堪託
劔佩蒼龍習氣難除却

金是瀛

河滿子

憶在玉牕金戶如銀曉
月初斜城角數聲畱不住
暗香携得還家梁上雙棲燕子
庭中一樹梨花

又

寂寞春殘淡院東風幾片花
飛多少佳期渾負却畫
簾見面還稀願作一雙胡蝶
憑他繡在羅衣

王 昊

百字令 九日宴集

悲哉秋也一天愁衰柳敗荷收拾蠍屐登高衝暮雨
爲訪東籬顏色橘綠柑黃蟹肥鱸美此景真難得逢
時不樂壽雖千歲何益 滿座塵尾風流僧彌法護
看當今誰敵指點寒花爭笑道鳳嶺龍山猶昔銀燭
燒殘玉笙吹徹醉把闌干拍佳人莫怪從來吾是狂
客

毛重倬

滿江紅 銅雀臺故址

滿目風沙愴落日三臺一色頻
悵望魏宮遺址墓田
難別寂寞兩河東
向帝淒涼千載西陵客
想總帷時
有擲書人黃華驛
焚繡褥沉椒壁
遲玉玦邀香跡
與漳流上下晚波搖
滴夕館蒐歸瑤吹隱
荒碑淚惹
銅盤泣暫停
驟瑋珣古樓西
評今昔

王士祿

浣溪紗

半捲流蘇罥綠霞
緩歌捉搦按紅牙
春風先到叅娘
家
選夢正宜衾鴨煖
昵人偏是鬢蟬斜
莫將銷恨

喚名花

巖 沆

如夢令

遶遍綠池無緒，却被黃鶯畱住。
兩兩怨東風，楊柳千條西去。
疎雨疎雨花外，一亭人語。

蘇幕遮

別離多良會，少客舍相逢，只合樽前笑盡說，思歸歸
尚早。寄語歡筵，莫唱江南好。
燭花殘，新月小，銀甲
調箏暗處，梁塵遶，醉也玉山依舊倒。
短夢初迴，愁絕

春鷄報

念奴嬌

京口

一艘如葉下揚州正值早春時節吹浪江豚都未起
任我朗吟蘭棹路指南徐雲橫北固十里輕帆截金
山晴了蒜山猶帶殘雪 依舊樹影中流鐘聲兩岸
風景真清絕狠石談兵何處是歷歷舟人能說劉尹
荒廳孫郎斷塚總被寒潮齧晚汀孤泊玉龍誰叫霜
月

田茂遇

浪淘沙

多病到秋殘，不耐輕寒。狂夫經歲客長干，何處是渠歸路也。九點青山，忍死望君還。珠淚潛潛薄情真，箇悞紅顏。莫向他年明鏡裏，空想雲鬟。

華 袞

臨江仙

鐵馬乍驚秋欲老，寒蛩催落梧桐。半黃橘柚雨濛濛。闌干偎欲暖，羅袂起西風。尺素雙魚音信斷，隔江愁殺芙蓉。夜闌獨自對簾櫳。銀河千里雁，綺閣一聲。

鐘

徐乾學

桃源憶故人

愛山臺在吳興署中吳菌次守郡時集諸名流觴詠其上各賦沁園春長調記之勒石未竟罷官而去今遂如半截碑書以志感

水嬉曾繫當年棹
惆悵尋春重到夢
醒白蘋紅蓼翻
憶薇天曉
狂歌痛飲誰同調
畱得薜碑殘
照麋鹿
一臺秋草減却山光好

顧湄

滿江紅

錫山遇蘇崑生話舊次韻

曲罷峰青誰軟軟淚珠拋豆是當日征南殘客柳生
蘇叟檄下通侯髯奮戟詩成學士胸羅斗到而今淪
落只龜年餘存否 廣場月猶挂口蕭寺雨重携手
任臺傾戲馬塘空走狗忼慨休歌燕市筑逡巡且醉
龍山酒奈白頭一闋授紅紅春風又

張珠斗

夢江南

楚詞之一

黃陵廟愁聽鷓鴣聲水到瀟湘真個碧雨來衡岳自
然青髮髯見精靈

張淵懿

絳州春

秋夜靜飛螢點玉鈎光一閃照見隔簾愁

月中行

杏花零落五更風吹向小樓紅醒時曾未得相逢又
况夢見中 愁多沒個安愁處消費得雨暗雲重夢
時相見已無踪不待覺來空

鄒溶

玉燭新

送顧梁汾粵遊

帝城携手記朝回解佩鳳池吟曉拂却緇塵暫理芙蓉輕棹聞說香叢醉宿等閒可便畱雙笑天涯小頻年煙月閩江越嶠重看秋水明霞又拾翠花田桑情未了彈指聲中目送片帆飛鳥我亦馳驅南北誤人短髮霜華早芳訊杳盼殺墜釵紅蓼

韓雲

柳梢青

詠白海棠

淡月籠紗香銷金粉露洗鉛華檀口無言空庭素影人在天涯水晶宮是儂家冰肌冷銀河影斜問夜

何如朦朧睡醒同夢梨花

宋 琬

浪淘沙 揚子江中流望金山北面

誰削玉嶙峋千尺雲根蛟龍淡護海西門金碧樓臺
青黛樹小李將軍 哀雁落紛紛喚起江豚鐘聲兩
岸客邊聞登覽不如遙望好倒影斜曛

蝶戀花

月去疎簾纔幾尺烏鵲驚飛一片傷心白萬里故人
開塞隔南樓誰弄梅花笛 蟋蟀燈前欺病客清影

徘徊欲睡何由得
墻角芭蕉風瑟瑟
虧伊遮掩牕兒
黑

蘇幕遮

過趙友沂故居有感

竹西亭歌吹地
廿四橋頭曾絡青
絲騎坐上秋娘兼
季次俠客名姝
夜夜春風醉
孝廉船丞相第
絃管
淒涼苔老朱門
閉燕子近從王
謝例太息回車
多少
羊曇淚

滿路花

胭脂井

紅牙敲玉樹翠
袖翻金縷臨春
梳洗罷調鸚鵡
陳家

狎客試把江山賭樓船天塹渡牀下軍書錦箋催寫
新句 舊宮胥井欄外青苔古明眸秋水綠爲黃土
海棠花落一片胭脂雨環珮歸何處泉底芳魂至今
遺恨擒虎

滿江紅

蟋蟀

試問哀蛩緣底事終宵嗚咽料得汝前身多是臣孤
子孽青瑣闥邊瓔珞草碧紗窗外玲瓏月况兼他萬
戶搗衣聲同淒切 梧葉落西風冽蓮漏下征鴻滅
似杜鵑春怨年年啼血千里黃雲關塞客三秋紈扇

長門妾背銀釭和淚共伊愁牀前說

余懷

踏莎行

晚菊

帝女霜濃鯉魚風驟燈前月下枝枝瘦與君曾結歲
寒交重陽已過還來就怕對芙蓉喜看橘柚陶家
甕底清香透東籬十月未開花江梅又在花開後

滿江紅

集笠鴻浮白軒

自笑狂夫何處是埋憂之地携手過城南韋杜偶然
遊戲亭榭舊依江總宅笙歌合奏香山伎怪次公不

葉葉聲聲 簾外新添蛩語烟中偏肅鴻翎枕前聽
碎不分明總恨飄零

少年遊

雨過重陽柳橋月小殘雁送新涼幾日晴川三旬沙
市無夢覺更長 秦箏寫盡離人意風急近瀟湘嶺
接吳雲江連越水畢竟是他鄉

南歌子

月落青苔院風過赤葉樓香凝繡幄下簾鉤正是獨
眠人起不梳頭 景物經秋澹心情到別柔梧桐一

今言衣集
卷一
P. 1
葉露新流昨夜燒香鈿合未曾收

鷓鴣天

垂柳籠烟春岸長嬌多恩重暗神傷香凝曉簾羞單
影花近高樓怕夕陽描翡翠画鸞凰拈針仍誤作
鴛鴦東流江水修鱗杳重檢來書字幾行

粉蝶兒

用毛東堂韻

不信離愁恁般排遣難絕數從前幾多枝節上高樓
牽翠幙紅燈明滅漾簾櫳影皺半床新月 荳蔻將
開芳心嫩藥重結玉弓兒倩誰溫捻正三春多好處

煩花惱葉軟楊枝却趁着東風活

洞仙歌

一川烟靄迷惜香蝴蝶楊柳舒眉綠染葉正河橋人
去別意徊徨殘紅盡又是飛絮相接倩遊絲繚繞
小住爲佳且向今宵共明月對淒涼錦瑟言密愁深
更屈指潛移萸萸踏芳草聽驛路流鶯怎不記斜陽
獨歸時節

百字令

黑窰殿登高

憑高矚遠正搗衣天氣長空凝碧芳草斜陽人不見

知是他鄉九日銅馬門前晾鷹臺下盡道飄零客消
愁惟酒阿誰一飲干石 雲際數點飛鴻西山依舊
青靄紛如織以下半山純黛色陵樹已非疇昔露冷
金莖歌殘絳雪浪把秋光擲故園何處五湖舴艋簞
笠

拋球樂 元夕荊州

古荊州稱雄麗三楚門戶錫親藩分去茲矢剪來桐
葉兀然茅土想往日令節良辰逞百戲魚龍飛舞說
道綵岫鰲峯桂炬星球珠殼填香路更不夜城中金

吾弛禁脂天粉地目招心與奈世事滄桑幾歲白馬
青巾嘯聚歎江山如此一片蒼涼祇聞杜宇 今夕
韶艷東風兒童奔走碎鈺零鼓試羅衫携翠袖年少
清揚姿度依稀漏永倩服玉人三五雌雄撲朔采茶
歌去髣髴神女凌烟霧瀟湘孤客坐清宵催起新愁
似縷算三國英雄爭地利興滅還無據况出塞裙釵
琵琶怨語

林鼎復

滿庭芳

丙辰花朝荆溪讌集和陳其年史雲臣諸子

二月如秋梅花作雨春疑未到江南蘭舟蠟屐山水
阻幽探陶寫全憑絲竹素心侶永夜高談憑誰和清
歌艷曲是處有何哉 琴尊羣彥在主人揖客十又
兼三更任詩沈筆逸興方酣爭說西溪勝槩宜晴日
斗酒雙柑待遊遍烟霞洞壑觴詠不爲貪

彭而述

金人捧露盤

燕臺懷古

記燕臺行樂處滿殘紅正西山烟雨濛濛承天門外
繡袍錦帶馬如龍名姬買醉旗亭北細吐雕籠 幾

何時成雪鬢銅駝在棘叢中烏衣巷無復江東五侯
七貴西風一葉響梧桐海青嘹唳笳聲起淚灑英雄

沈謙

清平樂

帶

香羅曾寄小鳳盤雲膩欲識春來腰更細剩得許多
垂地玉鉤移孔難尋有時撚着沉吟踪跡可知無
定兩頭都結同心

又

鬢雲低裊淡画雙眉小磨得菱花秋月皎病裏何曾

草草 悶看金鴨香浮妝成獨坐空樓百遍不如郎
意傍人都道風流

西江月

疎雨尚霑池草輕風暗掃庭梅小樓燈火画簾垂簾
外月華如水 被冷真愁擁髻枕欹長憶顰眉忽聞
金斗簸殘灰夜靜元來未睡

雨中花

月冷梨花渾欲謝沒甚事和衣睡罷寶帳燈明畫屏
香裊已在花陰下 獨行小徑心兒怕遙望見玉簾

低掛寂靜無人分明有路隔著秋千架

浪淘沙

彈淚濕流光悶倚回廊屏間金鴨裊餘香有限青春
無限事不要思量只是軟心腸驀地悲傷別時言
語總荒唐寒食清明都過了難道端陽

王士禛

夢江南

江南好又過落花朝玉茗歌殘情歷歷金堂人散水
迢迢竟去不須招

浣溪沙

北郭清溪一帶流紅橋風景眼中秋綠楊城郭是揚
州西望雷塘何處是香魂零落使人愁澹烟芳草

舊迷樓

阮亭遊記畧云出鎮淮門循小秦淮折而北陂岸
起伏多態竹木蒼鬱清流映帶人家多因水爲園
亭榭溪堂幽窈而明瑟頗盡四時之美犖小艇循
河西北行林木盡處有橋宛然如垂虹下攸于澗
又如麗人靚妝袂服照明鏡中所謂紅橋也遊人
登平山堂率至法海寺捨舟而陸徑必出紅橋四
面皆人家荷塘六七月間菡萏作花香聞數里青
簾白舫絡繹如織良謂勝游矣

又

小院蘼蕪欲作叢
秋千池畔画堂東
日斜鶯囀謝娘慵
情思詭人何處說
碧桐陰裏下簾櫳
玉釵微墮髻鬟鬆

醜奴兒令

隋皇昔幸東都日
錦纜迢迢鳳艚龍舸
剪綵宮中暮
復朝琵琶忽唱安
公子紅炬烟消故國
寒潮一曲清江柳萬條

眼兒媚

少年無賴好尋遊
何處着閒愁
羅敷陌上窈娘堤畔

到處淹留 艷情綺思消磨盡往事似塵漚楞伽堆
案離騷繫肘別樣風流

山花子

斗帳初垂懶卸頭任他紫剗減秦箏簾外銀河天似
水數更籌 梧葉催蛩涼到枕花枝和月午當樓還
似殘春寒食夜一般愁

偷聲木蘭花

綠楊陰裏秋千索乳燕學飛池上閣水漲銀塘落絮
浮萍又夕陽 方山亭下江南路畫槳凌波從此去

十四樓空萬葉千花淚眼中

小重山

和雲間詞

行雲如夢雨如塵秣陵惆悵事最銷
冤當年瓊樹照臨春胭脂井猶帶落花痕
芳草碧氤氳舊遊朱雀
桁幾回新青溪休賽蔣侯神風景換紅淚上羅巾

蝶戀花

和漱玉詞

涼夜沈沈花漏凍欹枕無眠漸聽荒雞動
此際閒愁郎不共月移窗罅春寒重
憶共錦裯無半縫郎似
桐花妾似桐花鳳往事迢遙徒入夢
銀箏斷絕連珠

弄

御街行 贈雁

銀河一雁歸湘楚似向離人語誰將二十五絃彈玉
軫金徽清苦水明沙碧參橫月落遠向瀟江去 衡
陽南望峯無數楓葉秋如雨不勝清怨却飛來應記
江南煙浦春社纔過又逢秋社燕燕行相遇

蕙蘭芳引

春思用清真韻

寒食又過看馬首淡烟飛鶯最望遠愁心江水撥醅
新綠櫻桃夢醒何處問回樓金屋記箇儂往日翠袖

天寒修竹 塞雪如花江花如雪幾更涼燠便千束
魏毫難寫柔腸九曲烟蕪遠近傷春送目春欲歸依
舊錦衾孤宿

南浦 寄興

河東游俠記雕弓在臂箭橫腰杜曲灞陵日暮小獵
競相邀颺勁拓弦千石看青天萬里灑風毛聽巖城
画角射生歸晚雪暗繡盤鵬 老去酒徒零落但歸
來南浦混漁樵苔臥綠沉槍澀秋水冷并刀猿臂才
名空射虎功名事都讓兒曹老子須一卷鴛摩禪榻

雨蕭蕭

水龍吟

揚子江上作

岷峨萬里滔滔荆吳九派來南紀潯陽東下秣陵西
望吳頭楚尾鐵甕風高海門雁斷角聲初起嘆從來
多少英雄割據都付與東流矣 盡道長江天塹暗
消磨幾番戰壘師兒年少寄奴老手正堪相匹北府
風流子有孫權甥如無忌到而今洗馬臨江愁絕一

天煙水

賀 宿

生查子

風剪柳絲長
雨潤苔錢小
殘月落高樓
一點春光曉
昨夜翠蛾愁
今日來何早
聞說海棠花
片片沾芳草

好事近

草綠蝶香濃
惱殺妒花風
雨雨後落英幾許
向画橋流去
夕陽醉起疑初曙
夢斷聞鶯語
又是晚霞零亂
嘆人歸何處

顧景文

多麗 上元

等卿來甚風吹下瑤砦不多時麝沉檀膩倩人扶出
金釵背燈花也曾同笑澹春山依舊驚回杏子紅裙
鶯兒黃袖一尖新窄過年鞋画屏風飛瓊萼綠生怕
鬪身材纔瞥見癡覓消盡燭淚成灰 判今生隨香
泊粉陪伊小立天街盼春來三分春去憐花睡一夜
花開淚洩征衫心牋恨字綠鱗黃耳信音乖無計是
參橫月落選夢寄妝臺慙慙瘦踏青近也懊惱離懷

萬樹

釵頭鳳

鬢垂縵衫移扣一春閒却調箏手風簾罅燈花謝金
錢擲向小窗占卦下下下新豐酒章臺柳問他還
記人兒否從前話題羅帕柔情終在薄情難罵罷罷
罷

陸次雲

清平樂

撲蝶

脂香粉冷翅影粘花影葉底枝頭斜復整似識潛潛
等等怪他朝夕成雙撲來一個偷藏不忍分離好

今言衣集
對放伊仍過東墻

韓銓

點絳脣

金臺懷古

買駿千金渥洼三見來
騶褭燕昭絕巧臨幅涓人稿
今古才人過此知多少
閒憑眺悲歌清嘯淚滿荒
臺草

張喟

雨中花

多少朱顏消客路
儘思量平生愁處是
蕭寺西風板

橋殘月水驛孤蓬雨 魚箋昨夜催歸去 淒楚煞一
燈雙杵便冷煖 心知醉醒人問也要天公許

季振宜

行香子 題扇上美人

煙樣羅襦月樣銀鈎人立處風景全幽誰將紈扇細
寫風流有一分水一分墨一分愁 天街似水迢迢
涼夜十年前事上心頭雙飄裙帶曾伴新秋在那家
庭那家院那家樓

李 焯

南鄉子

談笑解吳鉤，客滿西園。花滿洲。記得河橋分手路，悠悠一笛山陽幾度秋。灑淚向神州。極浦遙天不盡愁。花月春江渾似夢，休休老作人間馬少游。

趙而忞

菩薩蠻

高樓猛聽回颿鼓，多應逼送郎舟去。一揖尚匆匆，低言那得終。孤燈愁照處，啼斷雙珠雨。那更鬱金堂，聲聲蓮漏長。

又

濤箋細疊紅書押相逢不用卿家法蘭竹繪春恩字
中花有覓孤燈挑復落背面容難學携夢覓殘香
悔將花擲郎

眼兒媚

吹花風巧擁簾鉤翻樣一天愁小衫帶雨單衾疊雪
那處高樓鴛鴦夢薄休重說說恐倩覓畱癡心忽
在黃鸝幔底燕子釵頭

小重山

竟斷桃花蹴繡茵可知天意巧不由人高樓孤負翠
眉顰鴛鴦影何必画雙身 燭底對妝真只愁香罷
後又芳辰聽鶯莫向洛川濱三月夢無計靠花神

鳳凰臺上憶吹簫

用李夫人韻

粉墮寒舸黛辭霜艤教人多少回頭看絮香風擁亂
打漁鉤任鶻檣鳳幔隨浪影頃刻都休寒燈倦年年
學病事事防秋 羞羞軟香窰老千百疊銅津總不
堪畱念夢鷗花翦齊上高樓何似蕭郎鴛彩私描得
臨去雙眸無言處知他怎生嵌着離愁

嚴曾集

相思引

積雨瀟瀟不肯晴
青樓夢斷欲三更
芳心灰冷何處
覓雲行
誰道風流渾未解
當年薄倖舊知名
而今
老矣爛醉是生平

孫 賜

金鳳鈎

紅酥臉波如醉日
亭午梳頭還未三
春情況幾般心
事盡在眉尖眼尾
繡牀拋却殘
鍼繡界杏腮兩條

粉淚見人伴走弓鞵欲褪笑入碧桃花底

沈胤範

沁園春

簡友

盼得君來雪深地凍但少梅花憶邗溝魚至幾傳心事
燕山雁往也訴天涯才卸征鞍便投梵舍十日經過
一點茶鐘兒定怕酒醒檀炷枕靠袈裟竹西歌吹爲家
好收拾春心舊狹斜且橋邊金水晨隨班象禁中玉漏
暮聽宮鴉似我長飢逢人短褐只比詆諧朔自誇深閨
裏早望穿金帖愁換年華

朱彝尊

菩薩蠻

登雲中清朔樓

夕陽一半樽前落月明又上闌干角邊馬盡歸心鄉
思淡不淡小樓家萬里也有愁人倚望斷尺書傳
雁飛秋滿天

憶少年

飛花時節垂楊巷陌東風庭院重簾尚如昔但窺簾
人遠葉底歌鶯梁上燕一聲聲伴人幽怨相思了
無益悔當初相見

少年遊

清溪一曲板橋斜楊柳暗藏鴉舊事巫山朝雲賦罷
夢裏是生涯而今追憶曾遊地無數斷腸花塘上
鴛鴦梁間燕子飛去入誰家

四和香

小小春情先漏泄愛縮同心結喚做莫愁愁不絕須
未是愁時節纔學避人簾半揭也解秋波瞥篆縷
難燒心字滅且拜了初三月

玉樓春

柳

柔條曾記春前種乍起三眠妍手弄煙初罨歷態真
濃絮未顛狂絲尚重 依依別緒長亭共舊雨殘陽
空目送一灣流水小橋寒雷與斷腸人做夢

唐多令

疎雨過輕塵圓莎結翠茵
蕊紅襟乳燕來頻乍暖乍
寒花事了畱不住塞垣春
歸夢苦難真別離情更
親恨天涯芳信無因欲話
去年今日事能幾個去年
人

蝶戀花

露井梨花香覆雪雪映珠簾簾浸玲瓏月乍暖乍寒
愁思結春心輕似東風蝶何處飛來江上楫妹是
桃根姊定名桃葉一片閒情無可說砑羅却羨湘裙
褶

漁家傲

寄友晉陽

拂戶垂楊絲萬縷離情不耐西牕雨誰共故人燒燭
語還問取紅蓮綠渚花淡處白髮愁添歸未許秋
風汾水年年樹道盡人間腸斷句君莫去旗亭冷落
銀筍柱

酷相思

湖口

社鼓神鴉天外樹見渺渺江流去向晚來石尤君莫
渡大姑也畱人住小姑也畱人住 杜宇催歸朝復
暮轉把歸期誤儘燈火孤篷愁幾許風急也聲聲雨
風定也聲聲雨

風入松

朝雲不改舊時顏飛下屏山巖城乍報三通鼓何由
得遮夢重還露葉猶聞響屣風簾莫礙垂鬟 簪花
小字篋中看別思迴環穿針縱有他生約悵迢迢路

斷銀灣錦瑟空成追憶玉簫定在人間

紅情紅豆

凝珠吹黍似早梅乍萼新桐初乳莫是珊瑚零亂敲
殘石家樹記得南中舊事金齒屐小鬟蠻女看兩岸
盈盈素手摘新雨 延竈碧雲暮休逗入茜裙欲尋
無處唱歌歸去先向綠窗飼鸚鵡惆悵檀郎路遠待
寄相思猶阻燭影下開玉合背人暗數

滿江紅 塞上咏草

絕塞淒清又誰把秋聲畱住斜陽外寒沙搖漾亂山

無主瑟瑟乍驚心欲碎
茫茫不管愁如許
伴西窗燈火坐
黃昏蕭蕭語
催一陣茅簷雨
攪一片霜林杵
爲伊想遍了別離情緒
酒渴二更人散後
月明千里鴻飛處
夢滄江添箇釣魚船
風吹去

臨江仙

枯荷

三十六陂遠半竿日澹
一面風欹
画橈靜采菱人也
都歸幽期記紅袖滿碧
筩勸舊侶全稀
空畱得伴愁人夜
半聽雨柴扉
江妃亭亭翠蓋水珮零
落無遺剩寒蘆折葦相映
苔磯
淒其看晨颺裏鴛鴦住
凍了

還飛漁翁笑且香包冷飯針補秋衣

滿庭芳

李晉王墓下作

獨眼龍飛鷁兒軍至百戰真自英雄沙陀去後席捲
定河東多少義兒子將千人敵一一論功爭誇道生
來亞子信不愧而翁 前驅囊矢日三垂岡上置酒
臨風歎綠衣天下回首成空冷落珠襦散盡殘碑斷
不辨魚蟲西林外哀湍斜照法鼓影堂中

夏初臨

天龍寺高歡避暑宮故址

賀六渾來主三軍隊壺關王氣曾分人說當年離宮

築向雲根晚煙一片氤氳想團焦石罌猶存琵琶何
處聽殘勅勒銷盡英魂霜鷹自去青雀空飛画樓
十二金粉無痕春風嬾娜依然芳艸羅裙驅馬斜陽
到鳴鐘佛火黃昏伴殘僧千山萬山涼月松門

百字令 自題画像

菰蘆淡處歎斯人枯槁豈非窮士賸有虛名身後策
小技文章而已四十無聞一丘欲臥漂泊今如此田
園何在白頭亂髮垂耳空自南走羊城西窮雁塞
更東浮溜水一刺懷中磨滅盡回首風塵燕市草屨

撈鰕短衣射虎足了平生事滔滔天下不知知己誰
是

琵琶仙

秋日桑乾河見雙白燕

遠渚秋光乍疑是兩岸蘆花如霰剛得軟語輕廻差
池轉堪戀思一縷紅絲繫住怕飛入掌中難見明月
樓臺梨花院落曾否尋遍 問何事沙際飄零惹西
去潘郎鬢都變爭向水晶簾外對曉風初捲看画閣
銀釵幾許畱伴他傅粉人面借取玉女縫衣一雙并

剪

永遇樂 過雁門關

千里重關誰教踏遍雁銜蘆處亂水滹沱層霄冰雪
鳥道連勾注四角吹愁黃沙拂面猶有行人來去問
長途斜陽瘦馬又穿入離亭樹猿臂將軍鷓兒節
度說盡英雄難據竊國真王論功醉尉世事都如許
有限春衣無多山店酌酒徒成虛語垂楊老東風不
管雨絲煙絮

秋霽 嚴陵釣臺

七里灘光見擁樹歸雲石壁銜照漁火猶存羊裘未

做只合此中垂釣客星曾老算來無過煙波好况有
個偕隱市門僂女定娟妙 當此更想去國參軍白
楊悲風應化朱鳥翠微淡鷓鴣飛處半林茅屋掩秋
草歷歷柁樓人影小水遠山遠君看滿眼江山幾人
流涕把莓苔掃

胥馬索

送友人南遊兼訊李斯年

玉驄嘶須把青絲胥他住燕歌易酒莫辭今夕離亭
聚浮雲一望綠波千里滿目銷魂江淹賦計落花時
節黃陵楚竹湘烟響柔櫓 行旅羅施天末木瓜金

筑且伴參軍作蠻語亂水孤舟逢人少惟有冷猿昏
雨南尋李白問訊何如爲報頻年相思苦道故人別
來詩卷總是人間斷腸句

沁園春

李大出情人所畱指甲索賦

并剪分時逗向君前春心暗驚記銀釭照處會挑錦
字碧雲歌斷尚擘霜橙覆瓦彎環層冰碾薄只是中
心最不平相思苦任拋殘寶瑟閒殺瑤箏 詩人慣
惜傾城唱三疊陽關千里程把香囊繫定潛通叩叩
紅絲解罷低喚卿卿猛省秦樓纖纖指下何得愁中

却盡生孤眠夜想麻姑搔背一段風情

摸魚兒 鴨

任方塘羣游孤汎愛他不染泥滓避人纔見驚飛去
又早紛紛低墜堪妬是曾消受夜淡每並鴛鴦翅竹
弓漫試對黑白分明欄邊鬪罷芳草一茸翠 揚灩
好兩槳吳船小嘴采蓮人弄烟水晚來笑把紅裙裹
觸損冷花濃蘂歸也未正一色秋江灩灩波千里移
來簾底鑄就小鑪薰屏幃淡處長傍繡衾睡

汪 煥

減字木蘭花 七夕

當初曾記莫學雙星橋畔誓此夕歡娛翻羨雙星我
不如 相思難賦人到多情天亦妬天若情多忍見
經年一渡河

蛛絲休絡自恨巧多偏命薄不解銷魂始是生來厚
福人 針樓甘守天肯憐人孤影否天若相憐月也
何妨今夜圓

一叢花

當年曾共木蘭橈心事付春潮題詩紈扇垂楊下重

來處可記纖腰銀漢雲遮玉樓烟合無計問吹簫
閒情不奈漏迢迢冷雨一燈消幾時喚得東風轉桃
花影微度紅綃卜盡金錢憑將画檻空對美人蕉

鄒祇謨

浣溪沙

何事連宵唱懊悽雙垂斗帳繡芙蓉淒清早起忽征
鴻水驛蓬牕山驛店夜程霜月曉程風叮嚀有限
意無窮

菩薩蠻

篆縈心字安銀葉灰溫火慢香微
蕤焦尾對花彈秋聲應指寒
同心金鳳串莫作離鸞怨
夢峽與啼湘惜惜一夜長

祝英臺近

樹森森波淼淼回首舊京路
打併離腸釵數聲柔櫓
央及一片陰雲兩行煙柳
遮斷却乍分襟處無情
緒誰念寥落天涯杯酒和風
雨夢去愁來消息總無
據便教兩字平安三千里外
怎博得夜澣私語

山亭柳

本意

紋澱微流正萬縷初柔垂綺苑映妝樓此日藏烏多
少他時繫馬遲留漸漸綠淡黃淺一帶煙浮 花花
絮絮雷塘路風風雨雨到邗溝初學舞慣含愁遠恨
能傳玉笛輕寒乍到紅篝最是長條牽惹人在蘭舟

洞仙歌

半輪金鏡見橫空千仞飄泊韶華歎青鬢看燒殘絳
蠟簡點袖痕籌往事惟有淚花相瞋 人生無限恨
傷心夢裏愁魂暗相趁便珠樓十二費盡黃金人去
後金雁鈿蟬難認只一點相思仗東風緘寄與伊行

更誰憑信

賀新郎

席上被酒和阮亭

短髮愁千縷誰認得平生蕭瑟沉鱗羈羽忽發狂言
驚滿座會否目成眉語但記取樽前白苧送客留髭
傾一石便三更且聽吳歛去吾明日焚書舞 新聲
回鶻傳三部鐵如意唾壺相間零簫剩鼓何事關卿
春水皺漫道齊名韋扈最難得忘形賓主二十四橋
人似玉報平安書記今何許新月上桐初乳

胡餘祿

木蘭花令

題任城浣筆泉泉上祀李青蓮杜少陵配以長吉三賢舊遊也

長安市上朱顏好飯顛山頭青鬢老就中腸斷錦囊
人細瘦通眉長指爪泉聲檜蔭供吟嘯詞客有靈
應未杳可憐小杜最清狂咫尺芳池遊不到

吳本嵩

轉應曲

春暮春暮做雨做晴歸路飄飄泊泊天涯畱共明年
落花花落花落寶馬蘭舟香閣

華瞻祖

踏莎美人 咏橙有懷

帶雨親移經秋乍摘玉盤自占中央色風流誰比洞
庭霜曾是調笙深夜宿伊行 江橘醒微越梅酸重
軟金杯倩吳娃捧歸舟好趁鰕魚肥繫傍綠陰燒薤
擣香齏

毛際可

少年遊

丙辰余以北上過泗水見壁間才女留
題自稱吳門尹上詩序悽惋可誦末句
敢寄恨於白頭豈借辭於紅葉發情止
義尤非雙文待月之詞飛烟送郎之曲
所能髣髴小詞非以效顰聊與司馬青
衫同濕也

春鶯嘹唳拂柔柯，綉幃此間過。滿壁淋漓，慘紅啼綠，
反較墨痕多。燈前閱盡離冤句，江賦恨如何。團扇
長門古來如此，天也妒才麼。

踏莎行

秋柳

露冷霜欺，輕黃欲墜。楚腰不似當時麗。向來嬌嬾，
三眠今朝一味。萼騰睡。數點寒鴉，代余愁思。似云
華髮人如此，擬將情淚潤枯條。六橋盡是傷心地。

蝶戀花

桂魄淒涼寒玉宇，顧影無憀，影也添淒楚。爲月不眠

情更苦明宵願下廉纖雨
待欲澆愁斟綠醕酒盡
愁生畢竟愁爲主天上寄愁愁可去天孫正別銀河
渚

又

馬迹車塵何日了不分啼鵲只解催歸好楊柳條長
飛絮少離情一夕和春攪北墅高樓芳樹杪愁唱
驪歌酒罷天初曉頃刻杭州煙渺渺回頭殘月如燈
小

東風齊着力

送徐武令

桃萼辭紅萼絲凝碧節近清和武林門外風便向嘉
禾故遣髯徐北去西陵社意况消磨陽關唱聲遲三
疊特地延俄 燕市近如何酒人內能尋幾個荆軻
悲歌忼慨誰共醉顏酡我亦依劉數載因君別喚起
愁多秋淡後無憑音問寄雁來麼

金縷曲

題顧梁汾佩劍投壺小影次成容若韻

惟我與君耳更非因標題月旦攀援門第一諾相期
千古在車笠區區何意敢自附龍泉知己魄壘頻澆
還未散其滂沱灑作襟前淚把臂後淡如水 何須

獨醒憐皆醉信從來彘門終老長沙招忌閒却殘編
除是臥壺矢猶賢乎已思往事不須重悔舉世盡誇
皮相好歎傳神却在生綃裏顧子影毛生記

董以寧

搗練子

金作勒玉爲羈小馬驚香何處嘶紅板橋頭門半掩
幾絲垂柳掛黃鸝

一叢花

銀華九寸水溶溶長自映芙蓉春風一夜吹愁去相

看處漸覺眉鬆浮渲纔梳方空新換不似舊時慵
筆牀簫局幾塵封閒情拂拭中捲簾欲放遊絲入人
何處但憶春風草綠無痕花紅未落不見去來蹤

燭影搖紅

題余氏女子繡洛神圖

離合神光有人分得陳思繡流風迴雪訝驚鴻髮髯
還重覩可憶枕函金縷并珠璫洛川親授任人呼作
水上宓妃宮中甄后 記得當初袁家新婦啼痕透
此身早是屬君王不被人倂慙愁到棄損葱薤也應
同燃萁泣豆爲他想遍纔下鴛針幾曾輕就

哨遍 送孫無言歸黃山

爲問先生且住爲佳何事成歸計却道是十載趁萍蹤漫逍遙蜉蝣天地季主簾邊韓休市上閱盡人間世便功業蕭曹文章燕許不過如斯而已况他家父子是和非問商山何與諸公事白社遺民黃冠故里猶然遲矣再莫羨揚州佳麗負了山靈誓閣梅堤柳當年幾下蕪城淚繡瓦宮娥銀牀賓客只今名姓誰爲記天台可賦蘇門堪嘯奚必江東虎視把芒鞋整頓歸來閒憇向軒皇鑄鼎舊高臺餌丹砂身名俱

避有時來往空庭一二莊生老子倘教他日少微星
耀天上來徵處士好教兒童護柴門道先生高眠未
起

朱 瀾

百字令 和朱希真中秋

遙憐兒女對秋容新沐一天涼月低映簷牙窺綺戶
團玉正浮仙闕霧濕銖衣香消羅袖小膽金鈴掣空
濛一片草光苔影相接 應念紫塞征夫沙場風露
雙鬢平添雪萬丈寒芒千斛水飛灑高城清絕夢好

會歸山盟依舊冠掛如雲髮此情此恨古來多少人
說

彭孫適

生查子

簾影滑生雲蓮子清如水好月微風入夜分記起當
年事 鈿合悵空存愁病看如此仔細從前暗忖量
直個相思死

菩薩蠻

秦箏小篆銷宮餅繡衾一疊文鴛冷儂已不成眠知

伊更可憐 晨光生牖裏 曉幕常孤起 春夢太分明
關人半日情

柳梢青

何事沉吟小牕斜 日立遍春陰 翠袖天寒 青衫人老
一樣傷心 十年舊事 重尋回首 處山遙水淡 兩點
眉峯 半分腰帶 憔悴而今

鵲橋仙

烟蕪瀉綠 晴川鋪練 一陣風來 吹皺韶光 五百禁烟
時又過了 幾番花候 天桃染暈 垂楊添線 萬點春

光泄漏口噙紅豆寄多情爲誰把相思嘗透

風中柳

槐樹陰濃小院晚涼時節別離可奈腸如結歌喉輕
轉聽唱陽關徹情脉脉幾回嗚咽細語叮嚀道且
消停這歇燈火高城更未絕殘粧重整送向門前別
判今宵爲伊啼血

三姝媚

花宮清磬杳聽城頭一派角聲悲繞晚來情味只秋
牕無火暗螢相照解帶將眠剛月色臃龐移到千里

江關十年心事相思多少
恍在舊家庭院見朱幙
微垂綠雲初曉憐伊消瘦把別時踪跡向伊都告
旅泊頻年如夢也分明知道莫是相逢無幾依然去了

宴清都

咏螢

四壁秋聲靜疎簾外幾點飛來破暝輕沾露葉暗棲
花蕊亂翻金井有時團扇驚回又巧坐人衣相映空
自抱熠燿餘光願增照涼宵永
幾番去拂疎枝來
穿小幔高低不定隨風欲墮帶雨偏明流輝耿耿隋
家宮苑何在腐艸於今無片影向山堂且伴幽人琴

書清冷

画屏秋色

野照蕪城夕送遠目雲水蒼茫不極望斷音塵青樓
夢杳玉鈎人寂何處認隋宮見衰草寒煙堆積攢一
片傷心碧聽柳外哀蟬風高響滯如訴興亡舊恨聲
聲無力今昔可勝悽惻莫重問錦帆消息竹西歌
吹淮南笙鶴盡成陳迹轉眼又西風辭巢越燕還如
客落葉千重蕭槭萬事總銷沉唯有清江皓月曾照
昔人顏色

小諾臯

維揚旅舍聞蟬

碧蘚庭除綠陰城郭雨過遙空如洗正疎林兩兩鳴
蟬高低聲遞何待移宮換徵解竹天然相比憂餘音
還共南薰搖曳客去茶清棋殘香細故催人北牕好
夢一覺揚州驚起欹枕處偏清厲 託體疎枝翳形
密葉直是如羹如沸總不管西候羈情南冠客意似
水流光暗逝漸入淡秋天氣轉眼倩朔雁寒蛩更替
玄鬢凋殘白頭憔悴試臨風獨凭闌干側耳哀吟此
際容易使秋心碎

稍遍 春情和東坡韻

記得年時踏青節候芳草紛鋪地弄陰晴景色遍園
林屈指到清明天氣小池邊紫燕欲尋新壘紅襟對
掠桃花下正山杏籠煙海棠經雨穠艷天然無比映
高樓何處綠楊枝又搓得鵝黃千尺絲總釀就迷花
病酒懷人幾般滋味 素手好同攜鬱金屏外朱欄
裏欲訴綢繆鸚鵡生憎忒伶俐看弱不勝衣柔如無
骨仙裙怕逐東風起墨染烏闌袖沾紅唾脉脉春愁
無際漸画燭燒殘繁英飛墜似綺叢蛺蝶向花低忙

不了竊香私意任取粉銷春老一夢消身世蓬萊水
淺滄海塵揚畢竟此情難已九天鸞鶴倘相招爲報
人生行樂耳

陳玉璫

滿江紅 驪沙塔院

奮袂而登絕頂上條然獨立見渡口夕陽初下沙飛
烟急鯁母爭翻三月浪君峯對擁千尋壁更東南一
帶舊江山曾相識 孤雲去衣猶濕微雨過簷還滴
看闌干上下甕丹瓦碧稽首漫提灰劫事回頭已有

風塵泣問天涯知已是何人乘槎客

徐倬

賀新郎 聞砧用秋水軒韻

秦女衣裳卷下香堦砧未拭離魂先遣萬戶千門
一片月總是聲聲淒泫憶遠戍鐵衣銷繭玉臂慙慙
珠釧冷更誰憐鞦韆底霜痕淺南去雁八行展 青天
碧海心俱顯費工夫侵星熨貼迎風敲扁收疊鏤金
箱子內待寄傳書黃犬恐薄倖征夫難免用盡裁縫
針線力到臨邛竟向當壚典襟上淚勿輕剪

周在浚

賀新郎

燕邸送曹顧菴南還

秋老垂楊卷忽分携那禁惆悵酒卮難遣病客凄其
驚送客裘敝誰憐獨泣休更羨吳綾越繭五兩高懸
家在望涉黃河八閘寒濤淺迎落照孤帆展 行行
漸覺湖山顯漫追思納涼秋水小軒題扁三徑菊開
新釀熟坐看白衣蒼犬遊已倦知還不免天闕幽棲
春屐好待君來共問齊梁典花萼麗鶯聲剪

史惟圓

摘得新

繞花枝鶯兒和燕兒園林春晝永故飛遲訴盡春愁
千萬語有誰知

虞美人

秋柳

煙籠霧鎖長堤柳依舊青青否江潭搖落怨年華
揀盡長條愁殺欲棲鴉
纖腰猶向風前舞瘦減黃金
縷多情已是不禁秋何事斜陽相對綰離愁

紅情

詠半吐紅梅

碧牕驚曉漸數點檀霞映樓臨沼殘雪初融弱豔枝

言不集 卷一 一
頭未堪拘本是淡妝素質晴簷下壽陽眠覺誰點上
胭脂紅影鏡中小 寒峭春猶少看嫩萼低翻玉人
歛笑韶光及早頰頰潮痕故相惱幾處酒旗歌扇鎮
日雨中風帽桃溪側尋芳遍被伊賺了

女冠子

上元用竹山韻

暗塵飛也春燈影裏圖畫千門如繡酒旗戲鼓來往
天街清光交射疎星簷畔掛正是月華三五最圓今
夜看紛紛兒女競逐彷彿昇平遊耍 城牆一任寒
濤打掩重門自醉風月何須借燭花休地待尋理舊

句題殘羅帕粉桃箋細研收拾艷思綺語作漁樵話
奈無情蟾兔拋人又向柳梢斜下

摸魚兒

悼歡爲陳其年賦

正堪憐画橋烟柳風流暗想如許歌喉長憶當筵轉
淪落今歸黃土江上路空望斷杜鵑聲裏催歸處怨
春無主任無賴東風幾番作惡零亂捲飛絮思前
事攜手長堤日暮曲終人醉南浦梨花昨夜枝頭好
還似掌中相覩寒食雨只落得孤墳夜掩青松樹舞
衫拋去領幾隊笙歌夜臺供奉猶唱斷腸句

羅京

點絳脣

夜宿山海關

鐵馬金戈古來斷送英雄地玉關空閉賣却盧龍矣
醜酒臨風勝敗渾難記邊聲起月華如洗戰壘殘
煙裏

沈爾燦

夢江南

冬詞

簾下雪風灑翠琅玕香鴨碧消春霧透酒鱗紅近午
潮翻誰道外邊寒

菩薩蠻

溪南夜雪紅燈晚宿雲微鬢迎人嬾檀袖綠羅裙兒
家舊姓秦融酥低粉頰淺黛描初月煙柳恨絲絲
郵亭擁帚時

念奴嬌

行雲元不鎖葳蕤吹下橫塘一片小立東風曾解惜
愁沁雙尖尚淺繡額山桃羅裙石竹未許王昌見采
蘭春襖身材瞥認如燕歲歲浣盡溪紗烏鶯魚畏
不似當初遠但鬪舞衣珠翠冷宮錦平陽催剪驛舍

攀漿天寒倚袖露
浥青娥怨秋娘渡
口芙蓉開後三
變

潘時升

行香子

倚盡梧桐立盡東風
歎前歡雙鬢飛蓬
蘭箋細字幽恨無窮
正雨霏霏雲黯黯
月濛濛
箬馬丁冬
簾影玲瓏
怪尊前忒殺匆匆
雕闌香徑知與誰同
恨路迢迢
天淡淡
水溶溶

潘眉

點絳脣

非病非愁年來只恁耽消瘦
夢中携手却怪郎如舊
一葉驚秋道是人歸候
慵挑繡早來妝就盼到黃昏後

秦篆

臨江仙

初春

婉約春光如靜女含羞初
向人前再遲半月卽嫣然
覓消非怨別神醉未登筵
惟有遠山青覺早依依
淺黛堪憐東風易上美人肩
吹愁成一片不待落花

天

浣溪沙

釣臺

淮水蕭蕭落葉催
王孫舊跡長莓苔
煙迷雲夢易生
哀 百戰英雄懷一飯
千秋陵寢讓孤臺
西風滿眼
雁飛來

張台柱

思帝鄉

問歡期佯羞無一詞
擲個同心方勝與
郎知明夜酒
闌人靜月斜時
獨立花陰下扣釵兒

重疊金

麝蘭香透芙蓉錦金釵輕墜鴛鴦枕知道見時難不
嗔郎細看 隔屏燈未暝約帳搖花影銀月下雕簷
鸚哥喚捲簾

浪淘沙

春柳暮煙含鶯燕嬌憨飄綿舞絮恨相兼雨打風吹
收不了又上眉尖 繫馬弄金銜斜日厭厭夢中歸
路又誰諳渺渺茫茫花一簇說是江南

陳大成

西江月 題梅花幃

密蕊欲迷么鳳高枝亂颭蒼虬酒醒斜月下西樓相
對一般清瘦 幽夢三更乍覺高唐何似羅浮銀燈
疎影覆香篝知共阿誰消受

駱仁埏

虞美人

燕慵鶯倦嬌難起驚報春歸矣淡淡把酒拜垂楊倩
汝長絲百計繫春光 春光已逐東風去只繫春愁
住料春歸去也無家依舊恰如游子徧天涯

沈豐垣

憶王孫

不堪清淚灑臨岐惆悵東風能幾時
看著垂楊憶髩絲惜芳姿和雨和烟折一枝

謁金門

愁咫尺誰寄鴛鴦消息夜夜牆東閒佇立直是天涯
隔怕看月華流白照見形單影隻若使郎心長似
昔便不成雙得

卜算子

今言不集 卷一
漸覺晚風寒門外砧聲歇蟋蟀秋來有甚愁偏向愁
邊說 人是異鄉人月是傷心月小苑淒淒玉露零
飛下梧桐葉

又

疎雨鳴堦砌展側難成寐挑燈重起看芭蕉是誰箇
心先碎 新繡鴛鴦被擁著情如醉朝朝暮暮費沉
吟不如揜了和衣睡

西江月

手把銀牋玩惜魂移珊枕朦朧冷雲一片似情濃斜

月又迷幽夢 素壁惟存遺挂繡鞋
悄覓行踪杜鵑
夜夜哭東風淚積滿山花重

玉樓春

韶光九十今餘幾坊曲情情飛燕子
獨憐春草不成
花看盡晚雲都著水 綠江千里魚沉字
永日香銷
簾幕閉鏡中不見舞鸞人試問東風
多少淚

蘇幕遮

繡衾寒珊枕膩不慣單棲睡却頻頻起
喚著侍兒醒
也未柳顫花搖門外鴉兒吠 漫尋思
空徒倚月影

團團曾照人連袂露下碧空涼似水今夜如何又到
紗牕裏

訴衷情近

危欄獨倚對景翻教怨極亂山疊翠東來斜日淡紅
西匿撼撼庭柯葉墜風滯哀蟬欲噪渾無力空沾
臆恨不身生兩翼南魚北雁何處尋消息怎忘得花
因小立常遮月到幽期先黑替整冠兒側

陳世祥

西溪子

畱得暮雲千葉葉都將愁結倚高樓山凝碧人獨立待不思量又憶憶成癡月明知

更漏子

漏聲殘燈影碎一箇人兒怎睡閒繡被冷香篝孤幃見也羞芭蕉樹芭蕉雨恰似和誰共語兩滴瀝淚關于相陪消夜寒

減眉錫

賀新涼

寄荆溪友人用稼軒韻

大雅今誰說把新詞如歌紉蕙每懷吟葛兩地相思

重湖水望斷春雲秋雪漫猜訝朱顏華髮世事奕棋
柯欲爛只千秋不改青天月秦客在趙姬瑟 百回
歡醉終成別奈偏多眼前悲喜夢中離合壯志于今
同灰死還剩生來傲骨形木偶笑伊癡絕越水吳山
空歷遍扣孤懷欲響錚錚鐵歌當哭寸腸裂

汪鶴孫

昭君怨

詠骰子

繡毯呼盧聲起十萬擲蒲一戲自古幾英雄出其中
翠黛丹砂的愛與美人爭擲透骨是相思爾應知

周 銘

鶯啼序 題林下詞選

緝柳編蒲消不盡平生心事頻回首舊恨千端迴腸
九折而已兩字功名容易誤讀書萬卷徒爲耳甚英
雄老大心情付與流水 醉臉橫春好花簪帽總是
閒遊戲笑從來酒聖詩豪空畱斷簡殘紙羽觴醉煞
謫仙人綵毫抹倒元才子到而今費盡雌黃畢竟誰
是 幽悰幾許好似楊花無蒂一刻經千里便檢盡
奚囊錦字成灰有愁難寄秦女吹簫羅敷彈瑟算來

未是消魂候問何時禁得窮途汨霜天好夜熏爐瑞
腦頻添艸架牙籤重理行間脂印字裏香痕閨閣
多才思畱取松煤研露翠管調朱也難描出柔情密
意換羽移宮偷聲減字画眉樓上停鍼處想傷離怨
別多相似儘他魂磊填胸白雲何據此生已矣

今詞初集卷上

終